



11
1774
9



藏書紀事詩卷五

長洲葉昌熾

學究青雲別有梯行疏幅廣字難擠若言宋本皆精妙偏有
麻沙出建溪 杭世駿大宗 汪一之

鶴徵後錄杭世駿字大宗號菴浦浙江仁和人雍正甲辰
進士由浙江總督程元章薦舉授編修著有續禮記集說
金史補史漢北齊書疏證續方言詞科掌錄榕城詩話道
古堂詩文集注云先生歸田後自號秦亭老民與里中耆
舊及方外之侶結南屏詩社 蒲褐山房詩話先生以言
事罷歸沈文懋公送之有句云鄰翁既雨談牆築新婦初
婚議竈炊蓋惜之也先生有十子自第八子賓仁外餘皆
下世 王瞿道古堂集序菴浦於學無所不貫所藏書擁



1774
9

榻積几不下十萬卷董浦枕籍其中目睇手纂幾忘晷夕
閒過友人館舍得異文祕冊卽端坐默識其要 道古堂
集補史亭記杭子疏證北齊書既畢越明年乃補金史先
人庇屋積有餘材營度後圃規爲小亭窗楹疏達高明有
融乃徙先世所遺羣籍凡有關涉中州文獻者悉置其處
廣榻長几手目讎溫閒有開明輒下籤記 又欣託齋藏
書記汪子一之性無他嗜壹意於羣籍補其遺脫正其譌
繆儲蓄旣多鑒別尤審又云宋刻兩漢書板縮而行密字
畫活脫注有遺落可以補入此眞所謂宋字也汪文盛猶
得其遺意元大德板幅廣而行疏鍾人傑陳明卿輩稍縮
小之今人錯呼爲宋字拘板不靈而紙墨之神氣薄矣今

之挾書以求售者動稱宋刻不知卽宋亦有優劣有大學
本有漕司本有臨安陳解元書棚本有建安麻沙本而坊
本則尤不可更僕數青雲梯錦繡段皆成於臨場之學究
而刻於射利之賈豎皆坊刻也不謂之宋刻不可也五十
年以前曾與吳繡谷趙勿藥兩君斷斷切究之自矜以爲
獨得之祕一之卽能登吾堂而躋吾齋可不謂之夙有神
解乎欣託齋有山池之勝一之讀書其中卽藏書於其中
積卷至二十萬有奇可謂富矣 拜經樓藏書題跋記宋
本前漢書仁和朱朗齋跋云武林汪氏有振綺堂爲藏書
之所與同郡諸藏書家若小山堂趙氏飛鴻堂汪氏知不
足齋鮑氏瓶花齋吳氏壽松堂孫氏欣託山房汪氏皆相

往來彼此互易借鈔借校因得見宋槧元鈔不下數百十
種然其中關繫經史之大者無多惟欣託山房有魏鶴山
儀禮要義一部爲經學失傳之本

丹鳳梧桐別舊棲桃花紅到武陵谿寫生亦復含書味滄海
居然贖一蠶

金檀星輅 孫可探心山

嘉興府志桐鄉金檀字星輅諸生經史圖籍靡不徧覽好
聚書遇善本雖重價不恡或假歸手鈔積數十年收藏之
富甲於一邑所著有文瑞樓集銷暑偶錄 楊蟠文瑞樓
書目序婁東金明經星輅自幼嗜古好蓄異書築文瑞樓
以貯之此書目十二卷皆其所藏也明經籍隸桐鄉徙宅
於婁東其於桑梓之文獻罔弗留意康熙己亥校刊貝清

江集四十卷程巽隱集四卷後又訪購鮑徵士西谿集而
不得每以爲憾其風雅可想見矣 愛日精廬藏書志皇
元風雅三十卷黃丕烈跋曰書友攜來驗其裝潢是金星
輅家故物非出自尋常藏書人家 函宋樓藏書志漢泉
曹文貞公集宋賓王跋曰桃花塢文瑞樓藏元版元印字
畫端楷直出松雪又丁鶴年詩集宋賓王跋曰雍正丁未
得竹垞藏本於吳郡桃花塢文瑞樓 昌熾案士禮居句
曲外史詩跋金心山爲吳庠生寫物生動之趣溢於楮墨
又梅花百詠跋心山姓金名可探工文嗜酒而晚善畫又
道餘錄跋金心山余友也住郡中馬醫科巷先世富饒及
身貧窶又云心山所居曰滄蠡閣又雲溪友議跋郡中有

貧士金心山余數年前曾識之不過相遇於歲科試場中知其能文章而已近心山病且死書賈以其家書籍求售方知心山爲星軺孫藏書之家淵源有自宜其殘編斷簡亦多善本矣據此諸跋則星軺自婁東徙吳初居桃花塢後人中落又徙馬醫科巷桐鄉則其原籍也其藏書余所見者有文瑞樓結社谿山兩印

查浦查田有典型涪陵留共片氈青吳山家近忠清里燕市園鄰接葉亭

沈廷芳畹叔

鶴徵後錄沈廷芳字畹叔一字菽林號椒園浙江仁和人由兵部侍郎楊汝穀薦舉除庶吉士官至河南按察使著有隱拙齋集昌熾案杭大宗有隱拙齋箴沈果堂有隱拙

齋記果堂又有沈公墓表云仁和沈公以乾隆十六年十一月壬申葬其縣皋亭山公子廷芳請表其墓公諱元滄字麟洲以副榜貢生進經籍

聖祖仁皇帝命入武

英殿書局康熙六十年授文昌縣全祖望送沈菽林之蔚州引康熙中葉鹽官查氏之詩鼓動一時菽林尊公文昌君爲聲山詹事愛壻詹事下世查田諸老相繼歸里而風波驟起門戶蕩析文昌亦橫遭吏議菽林崎嶇患難藏書星散藤陰雜記接葉亭在爛麪胡同乾隆丁巳沈椒園侍御寓此徐恕齋以丹贈詩云牀休論上下廨各占西東詩派追初白宦情共輓紅楹書隅錄黃先生大全文集五十卷後有跋云黃山谷集南宋刊本吾家世藏宋本

僅留此種是可寶也子孫其善守之乾隆壬戌除夕隱拙翁廷芳志各冊有查昇之印仁和沈廷芳字晚叔一字萊園古柱下史古杭忠清里沈氏隱拙齋藏書印購此書甚不易遺子孫弗輕棄等印先生爲聲山宮詹外孫是書乃查氏所藏而後歸沈者世無二本洵至寶矣

敝裘典盡典遺書且訪監倉策蹇驢如此長安居不易猶分清俸苦抄胥

全祖望紹衣

鶴徵後錄全祖望字紹衣號謝山浙江鄞縣人乾隆丙辰進士改庶吉士散館外補假歸著有鮚埼亭詩文集注云先生有兄祖謙六歲殤太夫人哭之哀忽張目曰吾當再來補之後十年生先生亦慧甚故小字曰補嚴可均全

紹衣傳性好聚書弱冠時登范氏天一閣謝氏天賜閣陳氏雲在樓遇希有之本輒借抄昌熾案謝山有讀吳艸廬春秋纂言云抄之同里陳同亮處士家此殆雲在主人乎鮚埼亭集雙韭山房藏書記子家自先侍郎公藏書大半抄之城西豐氏其直永陵講筵賜書亦多所稱阿育王山房藏本者也侍郎身後歸於宗人公之手以其爲長子也先和州公僅得其十之一宗人子孫盡以遺書爲故紙權其斤兩而賣之無一存者先宮詹平淡齋亦多書諸孫各分而有之遂難復集和州春雲軒之書一傳爲先應山公再傳爲先曾王父兄弟日積月累幾復阿育王山房之舊而國難作里第爲營將所踞見有巨庫以爲貨也發視

皆書大怒付之一炬先贈公授徒山中稍稍以束脩之入
購書其力未能購者或手抄之先君偕仲父卽以抄書作
字課已而予能舉楮墨先君亦課以抄書吾鄉諸世家遭
亂書籤無不散亡吾家以三世研田之力復擁五萬卷之
儲胥其亦幸矣雙韭山房者亦先侍郎之別業在大雷諸
峯中今已摧燬而先贈公取以顏其齋者也 又春明行
篋當書記子年來陸走軟塵水浮斷梗家書五萬卷中常
捆載二萬卷以爲芒屨油衣之伴舟車過關口稅司諸吏
來謁篋者如虎一見索然相與置之而去雍正癸卯留滯
長安米貴居大不易不能不出其書質之適監倉西泠黃
君聞余之有是舉也請歸之於其邸黃君之邸與子有十

里之遙過此以往蕭晨薄暮偶有攷索策蹇驢而爲剝啄
之聲者非予也邪雞黍之請自此殷矣 謝山年譜乾隆
元年先生入庶常館借永樂大典讀之抄高氏春秋義宗
荆公周禮新義曹放齋詩說劉公是文抄唐說齋文抄史
眞隱尙書周禮論語解袁正獻正肅文抄永樂甯波府志
皆世所絕無而僅見者昌熾案先生抄永樂大典記見鮪
埼亭集外編

豐沛從龍諸子弟亦知注墨與流丹汰除羸卒論精騎富察
終教勝納蘭 富察昌齡敷棧

袁枚刑部尙書富察公神道碑公諱傅鼐字閣峯先世居
長白山號富察氏祖額色泰子四次子驃騎將軍噶爾

漢輔

聖祖致太平公公以刑部尚書落職薨於家子三人長昌齡官編修有父風公所居稻香草堂有白雁峯鼇峯東皋南莊諸勝積書萬卷 禮親王嘯亭雜錄富察太史昌齡傳閣峯尚書子性耽書史築謙益堂丹鉛萬卷錦軸牙籤為一時之盛通志堂藏書雖多其精粹蔑如也今其遺書多為余所購如宋末江湖諸集多公自手抄者亦想見其風雅也 李文藻琉璃廠書肆記延慶堂劉氏夏閒從內城買書數十部每部有曹棟亭印又有長白敷槎氏堇齋昌齡圖書記蓋本曹氏物而歸於昌齡昌齡官至學士棟亭之甥也 平津館鑒藏書籍記新刊名臣碑傳琬琰集棟亭曹氏藏書有長白敷槎氏堇齋昌齡

圖書印

燕坐花南水北亭文園銷渴為虹屏人獲價比書偏貴好為

神農補本經 陸烜子章

兩浙輜軒錄陸烜字子章一字梅谷又號巢雲子平湖人徐熊飛曰先生弱冠受知於諸城竇少宰後棄諸生隱居胥山邱為里作巢雲子傳見志沈文恪公主敷文講席撫軍屬其采錄遺書乃引先生為助教勘甚精 東湖叢記梅谷刊奇晉齋叢書收藏甚富嘗見書估攜來中統本史記後有梅谷跋侍兒虹屏書有梅谷掌書畫史沈采虹屏印記又晏公類要後有虹屏跋云晁氏郡齋讀書志謂六十五卷焦氏經籍志謂八十卷而此僅三十七卷然其中

有公四世孫表補闕至歷代雜錄止蓋已爲足本矣曾南
豐集有此書序爰錄冠首時乾隆辛丑四月十二立夏日
是歲閏五月春事未闕海棠繡毬木筆紫荆薔薇花尙繁
盛新妝初畢御砌綾夾衣晏坐花南水北亭啜鏡溪新茗
書眞藏書家韵事也 梅谷隨筆凡治定書必用雌黃其
色久而不渝余嘗見李獻吉評杜詩錢牧翁手批元遺山
集皆手澤如新修補古書漿糊中必入白芨則歲久不脫
近購得宋余靖武溪集趙璘因話錄施彥執北窗炙輶皆
汲古閣物裝訂極精緻而於破損接尾處皆脫蓋不用白
芨之故亦藏書家所當知也 又梅谷人參譜序余得怔
忡疾醫者曰非人參不可願近日遼參貴逾珠非貧家安

所得此因徧覽書幾百種披閱手鈔稍加論列不十日譜
成而病若失乾隆丙戌重陽前一日

太卜三夢先致騎鄭人訟鹿更迷離撥灰縮柏何須爾轉瞬

鐘鳴欲覺時

董熈謂瑄

董蠡舟鑄范

兩浙輜軒錄董熈字謂瑄一字訥夫烏程人諸生雍正甲
寅薦博學鴻詞著南江詩文集陳世修序略曰謂瑄沈靜
嗜學家富藏書又嘗遊其外王父曹秋岳先生之門倦圃
所藏人閒不經見書謂瑄獨窺之故學有原本昌熾案倦
圃之壻名師植字聖衣一字汾園烏程諸生亦見輜軒錄
張鑑夢好樓記周官太卜掌三夢而列子六侯與經不
異三曰思五曰喜其爲氣淫於藏則有餘於內不足於外

一也里中有沈默之士曰董子鑄范讀書志古不慕榮祿於書靡不窺而猶病其藏家之少閱市之淺顏其所居之樓曰夢好棊几竹榻百城面南以寄其深愛篤嗜之思又云自宋歐陽氏信齋然口本古文之說而後之託安國孝經以暨毛漸三墳豐坊魯詩不一也以子之夢其必撥灰縮粕神游域外將遠駕乎皇侃論語義疏七經孟子攷文之足貴不大快歟又云余曩在琅嬛仙館校文瀾閣未收之書得百有數十種皆非世所經見心欲抄其副而苦無力然則余之校不過一夢而子今之夢又焉知不爲得鄭人之鹿者邪鑄范名蠡舟烏程人爲余同年雲帆先生子世家舊姓近見其藏書目所得蓋不少矣遂爲之記

祕囊已作君山贈流電飄風不再來
綏等青田花乳癖閉門

三日泣瓊瑰

王藻載揚

楊復吉列歐

蘇州府志人物傳吳江王藻字載揚平望人好爲詩初業販米嘗題桃源圖編修沈樹本見之極口延譽遂游京師乾隆元年薦舉博學鴻詞罷歸好蓄宋板書青田石印章有友借觀誤墮地碎垂泣三日其風趣如此又楊復吉字列歐乾隆壬辰進士歸班需次年未及壯好聚書王鳴盛深推服之吳翊鳳遜志堂雜抄余好藏書借抄於盧抱經學士王西莊光祿吳槎客明經楊列歐進士楊復吉夢闌瑣筆宋汪彥章浮溪文粹明初板用繭紙印頗工綴後附羅鄂州遺文二篇乾隆庚辰購之張太史損持後

人又周霆震石初集較他本多幾倍徒損持先生任興國時所抄壬寅歲鮑淥飲過訪見而愛之余因持贈後有元文選之役向淥飲索之久無以報存亡不可必矣

毛錢而後君主盟縱橫四面書爲城釀粇掃葉皆清課坐擁

寒壇對短檠

席鑑玉照

黃廷鑑愛日精廬藏書志序汲古毛氏述古錢氏兩家陵替吾邑藏書之風浸微然亦未嘗絕也以余所聞玉照席氏慶曾孫氏虞巖魚氏皆斤斤雪抄露校衍其一脈惟多留心於說部小集以一二零編自喜而於經史轉略士禮居藏書題跋記顧抱冲案頭有影宋本東家雜記末有茱萸山人席鑑跋云毛省庵先輩影寫本余於丙申仲夏

得之汲古閣中 天祿琳瑯離騷草木疏虞山席鑑抄本有墨妙筆精虞山席鑑玉照氏收藏宋記 又續編班馬字類有席鑑之印學然後知不足朱記 楹書隅錄影宋抄五經文字九經字樣每冊有趙宋本墨妙筆精希世之珍虞山席鑑玉照氏釀花草堂諸印 昌熾案玉照藏書極富所刻古今書籍板心均有埽葉山房字余曾見所藏寶晉山林集有萸山珍本印又按海虞詩苑席鎬詩有湘北寶箴玉照讀書敏遜齋猶記十五年前余亦嘗偕對揚敬修居之因題示二首小齋罷琴酌羣季尙嬰孩此日開青案頻年閉綠苔寒壇我家物春草惠連才絃誦遙相接惟餘叔子哀其第二首云三人連袂袪萬卷浩縱橫一門

羣從讀書爛古蓋不減孫錢二氏矣

鴛鴦不惜度金鍼字字書林座右箴三折肱爲醫國手廣長
舌是佛家心

孫從添慶增

稽瑞樓書目春秋經傳類求十二卷邑人孫從添過臨汾
同撰從添字石芝好聚書 黃丕烈藏書紀要跋孫慶增
所藏書余家收得不下數十種其所著述則未之聞也此
藏書紀要言之甚詳且備蓋亦真知篤好者孫公去世未
遠周丈香巖幼年曾見之時已七旬餘兼善醫術其所藏
書鈐尾一印曰得者寶之殆守人亡人得之訓耶 藏書
紀要自序余無他好而中於書癖家藏卷帙不下萬數雖
極貧不忍棄去數年以來或持橐以載所見或攜函以誌

所聞念茲在茲幾成一老蠹魚矣同志欲標其要竊不自
量紀爲八則其當與不當冀有識者諒之虞山上善堂慶
增氏孫從添筆

元蟬噪窗日卓午當風散書書有樞抱書太息得者誰但願
生逢晁公武

顧士榮文甫

鐵琴銅劍樓書目詩式邑人顧文甯藏卷首有臣榮之印
又吟窗雜錄亦文甯所藏文甯名榮居邑之梅里鎮詩人
也昌熾案文甯名士榮與王柳南同訂海虞詩苑其曝書
有感云玄蟬噪薰風嘈嘈庭前木晴牕白晝長赤日盛炎
熇不暇傲羲皇且抱殘編曝芸馥當風散衣魚隨手撲破
損感年深校閱憐毫禿不惜傾囊購不辭胝手錄誇人未

全貧堆牀尙連屋世緣已漸忘愛此猶骨肉身後無可授
生前不能讀展看三太息將入阿誰目有聚應有散此理
籌之熟自笑尙忘疲檢點仍歸匱

海東耆獻隱塵市舊聞掌錄七絃谿登樓俗士頻迴駕此是
龍門百尺梯 魚元傅虞巖

同治蘇州府志魚翼字振南自號烏目山樵明開封守侃
九世孫 又魚元傅字虞巖翼子素嗜書尤好金石文窮
岩絕壑手自摹榻 許行徙海虞畫苑略序天池山人魚
君振南負才而隱於市塵性喜畫善鑒別古迹真贋 又
王應奎序魚翁以廉吏子孫所居臨街小樓收藏古今名
迹甚夥俗子請觀者拔梯不令上有吾子行之風撰海虞

畫苑略未竣令子虞巖續成之 顧鎮魚虞巖墓表君諱

元傅字虞巖常熟人既析縣爲昭文人世篤孝友君性剛
于世少所可獨嗜書雪抄露纂矻矻不少休尤熟于里中
掌故凡寸楮片紙爲鄉先輩所遺者寶護如拱璧至一樹
一石並識爲某家物其變遷易主曲折原委如數家具君
坐卧一小樓嘗爲余言魚氏居此閱十四世矣卒時在乾
隆三十三年十月初四日年六十五 鐵琴銅劍樓書目
書齋夜話四卷石田翁物歸魚虞巖閒止樓又曲洧舊聞
有魚東川藏書記 持靜齋書目黔書二卷魚元傅手抄
有魚東川藏書印

社散南屏寺裏鐘年華終賈騁詞鋒書船何似玉川子雪壓

短蓬過五茸

汪啟淑秀峯

杭郡詩輯汪啟淑字秀峯號訥庵歙人官工部都水司郎中注云訥庵寓吾郡小粉場顏其聽事曰飛鴻堂嗜古有奇癖藏書百廚乾隆三十七年

詔訪遺書訥庵家

進呈六百餘種

恩賞古今圖書集成一部士林榮

焉少工吟詠當杭堇浦太史歸田之後與樊榭諸老結社南屏訥庵以終賈之年騁妍抽秘進與諸老宿抗行其他雜著有焯掌錄水曹清暇錄小粉場雜識鮑廷博庶齋老學叢談跋吾友郁君潛亭所貽也聞有誤書思之不適聞某公有善本欣然偕潛亭往借秘不肯宣是爲乾隆甲午迨嘉慶甲子始據錢中父本一掃烏馬之譌往讀某公

所著清暇錄歷數近來藏書家而自述其儲蓄之富曾幾何時已散爲雲煙矣昌熾案清暇錄當卽訥菴所著水曹清暇錄訥菴敝帚自珍誠爲可鄙然淥飲於身後作快心之論亦非長者之言也 厲鶚樊榭山房集汪秀峯自松江載書歸招同人小集分韻雪壓扁舟浪有稜載來書重恐難勝排聯清興惟同鶴增長多聞似得朋歸洛舊傳東野句入杭新並蓼塘稱銜杯不獨相欣賞欲賃鄰居翦燭膽自注孟郊有喜盧仝書歸洛詩 士禮居藏書題跋記嘉慶辛酉秋坊間收得汪秀峯家書內有五行類事占三冊其紙皆明嘉靖時冊籍紙背閒可辨識 又續錄已巳春余爲武林之遊上城隍山索觀古書於集古齋蓋其

主人在杭城書估中爲巨擘而去歲又新收開萬樓書也
鐵琴銅劍樓書目曲江集舊爲飛鴻堂汪氏藏書有新
安汪氏啟淑私印二朱記 陸心源周易爻變義蘊跋有
新安汪氏朱文方印啟淑私印朱文方印蓋開萬樓舊藏
也

銅雀葦蕤鎮二喬各攜寫韻降文蕭范張鉤黨今除籍好問
東倉第幾橋 陸時化潤之 金元功

王昶國子監生陸君潤之墓志銘君諱時化號聽松潤之
字也太倉州人國子監學生祖毅康熙戊辰進士官陝西
道監察御史父恬太學生君嗜法書名畫精鑒別嘗集生
平所見數百種記其紙絹詳其行款識者比之退谷江村

兩銷夏錄又聚書萬卷購善本而手校讎之以貽其後裔
乾隆四十四年病歿年六十有六子一愚卿克承其家
又云子昔讀常熟毛清傳稱清以孝弟力起家有幹識儲
書數萬卷甲於東南是以子晉舉而刻之迄今汲古閣書
盈天下而晉三子咸著文譽今君憲藏圖籍書畫愚卿廣
收博貯不減於且以淑其三子視毛氏之子孫何其前後
同揆歟 嚴可均書明刻太平御覽後張天如先生曾孫
語余曰先高祖有宋刻本御覽千卷先曾祖分授二女
嫁裝各得五百卷今但問陸願吾可以就校願吾卽先
姑之孫陸時化字潤之號聽松之子住太倉州西門內大
橋東石皮弄口路北 士禮居藏書題跋記耕學齋詩集

十二卷曹潔躬藏本適書友以東倉陸時化手抄唐宋元
明人集求售內有是集留之校對一過 鐵琴銅劍樓書
目道德寶章有陸潤之嘯雲軒朱記又國策太倉陸氏藏
本卷首有潤之所藏朱記楚詞舊爲太倉陸氏藏書卷首
有陸時化印聽松老人二朱記又陳伯玉集有金元功藏
書記深柳讀書二朱記昌熾案元功亦太倉人士禮居著
錄新定續志卽其舊藏丁氏持靜齋書目艾軒集有金元
功藏書記金氏南樓書籍二印其他印識見於各家題跋
者尙多其藏弄之富可知埒見於此

安廣布山采土風斤圓水與鬱林通市中尙見茲唐子定怪
載書此寓公 王孝詠慧音

天祿琳琅後編通鑑紀事本末宋板元印有王印孝詠慧
音兩朱記 楹書隅錄宋本章蘇州集有王孝詠印慧音
太原仲子後海學人各印 昌熾案士禮居藏書題跋記
汪水雲集亦有王孝詠慧音藏書印慧音先生事跡不見
於郡志惟王惕夫淵雅堂集有嶺西雜記序云嶺西雜記
者吾鄉王慧音先生孝詠居嶺西時所作也先生爲諸生
久不利出而客游與故長沙陳恪勤公相厚善公歿而先
生歸然享大年當雍正乾隆之間大有名

頰面何憂脂藥錢且聽宋槩及唐鐫手持篋櫝飛雄辯玉屑
霏霏落四筵 蔣宗海春農

宋元以來畫人姓氏錄蔣宗海字春巖號春農丹徒縣人

壬申進士官內閣中書工詩能篆刻又善丹青著有春農吟藁 翁方綱蔣春農文集序乾隆壬申進士以古文名家者二人餘姚盧紹弓丹徒蔣春農紹弓之文得力於校勘諸經貫串百家每聯几賦詠紹弓起步庭中以手自拭其面同人笑曰此君胷中剖別同異省卻頰面脂藥錢耳而春農每來座中手篋橫快辨橫飛有與商古籍者則屈指唐鑑宋槧某書某板闕某處某家鑿藏某帖如貫珠如數家珍問者各得其意以去而春農雜以諧謔初若不經意也 顧宗泰月滿樓集懷蔣春農舍人詩丁卯橋邊偶泊船爲開幽徑做芳筵注云庚寅過潤招飲椒馨閣王夢樓鮑雅堂同聚 楹書隅錄宋本大戴禮記潤州蔣氏藏

書

月飲盧仝認舊題抱經分峙浙東西金峩玉几青厓宅學士姚江近會稽 盧文弨紹弓

翁方綱抱經先生墓志銘公姓盧氏諱文昭字紹弓號磯漁又號槃齋晚更號弓父抱經其堂顏也人稱曰抱經先生乾隆壬申一甲第三人進士官翰林院侍讀學士生於康熙丁酉六月三日卒於乾隆乙卯十一月二十八日子男四慶詒武謀慶鍾慶錄 嚴元照書盧抱經先生札記後先生喜校書自經傳子史下逮說部詩文集凡經披覽無不丹黃卽無別本可勘同異必爲之釐正字畫然後快嗜之至老愈篤自笑如猩猩之見酒也 錢大昕盧氏羣

書拾補序抱經先生精研經訓自通籍以至歸田鉛槧未嘗一日去手奉廩修脯之餘悉以購書遇有祕抄精校之本輒宛轉借錄家藏圖籍數萬卷手自校勘精審無誤自宋次道劉原父諸公皆莫能及也 金甌題盧紹弓編修檢書圖盧郎溫潤乃如玉獨有校勘嚴仇讎目勞手倦苦相角授經餘力閒須偷矧當退食百城擁縱橫穿穴資旁搜尋蹤宛轉蛇赴壑得雋掣曳魚銜鉤後先佐證每連連新舊連責期畢收時時堆案礙雙肘正似獺祭陳沙洲 錢大昕抱經樓記四明古稱文獻之邦宋元之世攻媿樓氏清容袁氏藏書之富甲於海內明代儲藏家則有天一閣范氏而四香居陳氏南軒陸氏次之然聚多易散唯范

氏之書歸然獨存浙東西故家莫能逮焉盧君青厓詩禮舊門自少博學嗜古尤善聚書遇有善本不惜重價購之聞朋舊得異書宛轉借抄晨夕讎校搜羅三十年得書數萬卷爲樓以貯之名之曰抱經蓋取昌黎贈玉川子詩語也曩余在京師與君家召弓學士游學士性狷介與俗多忤而於余獨有水乳之投學士藏書萬餘卷皆手校精善而以抱經自號青厓與學士里居不遠而嗜好亦略相似浙中有東西抱經之目茲樓之構修廣閒架皆摹天一閣而子孫又多能讀書者日積而月益之罔俾范氏專美於前是所望也 兩浙輶軒錄補遺倪象占字九山象山優貢生著有青櫺館詩館郡城盧青厓家盧氏有抱經樓藏

書數萬卷九山俱經手校乃作抱經樓藏書記一篇石刻
行世

倬直承明舊有廬移家新賃廠東居紅橋花事休相憶日日
攤錢問故書

程晉芳魚門

袁枚翰林院編修程君墓志銘君程姓名晉芳字魚門一
字載園祖居新安治鹽于淮父遷益生子三人長原衡季
述先君其仲也乾隆初兩淮殷富程氏尤豪侈多畜聲色
狗馬君獨惜惜好儒馨其貲購書五萬卷招致方聞綴學
之士與共討論癸未

天子南巡召試第一

賜中書舍人再舉進士未幾開四庫館君爲纂修議敘
授翰林院編修死年六十七先嗣子瀚後生子溧翁方

綱程先生墓誌銘君有桂宦書日若干卷桂宦者君讀書
室名家素饒於財自少至壯積書三萬餘卷中年以後家
落而書亦稍散失矣然其豪氣真摯發於天性嗜書籍若
飢渴待朋友如性命猶不減其家全盛時也君諱晉芳初
名廷鑽藤陰雜記廠東門內一宅相傳王漁洋曾寓近
程魚門移居以詩寄袁太史枚有勢家歇馬評珍玩冷客
攤錢問故書之句顧宗泰月滿樓集懷師友詩程載園
一首云春日看花淮浦舟紅橋襍飲又句留多君終遂平
生願得入承明掌校讎

握手城東問紀羣弟兄父子並能文勘書難似孫深柳池館
松聲坐水雲

汪憲干陂

子汝琛坤伯

瑜季懷

璠仲連

杭郡詩輯汪憲字干陂號魚亭錢唐人乾隆乙丑進士官
刑部陝西司員外郎有振綺堂稿注云魚亭性耽蓄書有
求售者不惜豐價購之點勘丹黃終日不倦乾隆三十七
年 詔求遺書其長君汝璫以祕籍經進 御

題曲洧舊聞書苑菁華二種

恩賜佩文韻府一部

文綺二端足爲海內嗜學之儒勸矣 又汪汝璫字坤伯
號滌原憲長子有北窗吟稿 又汪瑜字季懷號天潛憲
季子子初字絳人邑諸生 又汪璐字仲連號春園憲子
乾隆丙午舉人有松聲池館詩四卷 又汪誠字孔皆號
十村璐子乾隆甲寅舉人刑部主事注云十村篤志縹緲
無他嗜好先世藏書最富而未有書目因取所藏書編分

四部詳攷撰書人並注明得自何本閱歲而成凡書三千
三百餘種計六萬五千卷 又汪遠孫字久也號小米誠
子嘉慶丙子舉人候補內閣中書注云小米溺苦於學盡
發先世藏書讀之所著有詩攷補遺國語攷異發正古注
漢書地理志校勘記借閒生詞購別業於水磨頭曰借閒
小築因自號借閒漫士 又汪迪孫字子惠誠子 陳奐
師友淵源記小米家有四世藏書振綺堂目甲於浙右卒
年僅四十有三弟适孫字亞虞卒年四十邁孫字少洪卒
年四十六 胡敬內閣中書汪小米傳孔皆公以君之嗜
學也病中指楹書示曰他日以畀汝君著書務爲根抵之
學子一曾撰 陳用光振綺堂書目序余來杭州聞汪舍

人遠孫家藏甚富借觀其目舍人既以臨安志見贈並索
爲目錄序舍人之藏書分經史子集爲四部部各有子目
而所攷證其書之佳否真偽及得書之緣起自注於上方
甚詳且秩然有條理也 鮑廷博輓汪魚亭比部詩整整
牙籤萬軸陳林閒早乞箸書身種松漸喜龍鱗老埋玉俄
驚馬鬣新清白家聲欽有素丹黃手澤借還頻西風誰送
山陽笛偏感春明儻宅人自注先生既捐館余尙向鄴架
借書 龔自珍雜詩振綺堂中萬卷書乾嘉九野有誰如
季方玉粹元方死握手城東問蠹魚 張廷濟題汪小米
松聲勘書圖較書難比著書難深柳圖傳孫叔然難得水
雲今健者更搽文字到盧前自注校書難比著書難孫頤

谷侍御自題深柳勘書圖句

韓非口吃箸說林校讎七略似劉歆山河泡影談何易一見
公羊涕不禁 紀文達韵

朱珪協辦大學士禮部尙書紀公墓志銘嘉慶乙丑二月
協揆獻縣紀公薨于位其冬公子汝傳孫樹馨來請銘按
狀公紀姓諱昫字曉嵐一字春帆晚號石雲乾隆甲戌進
士辛卯開四庫全書館公實摠其成筆削攷核定爲全書
摠目哀然巨觀 又五老會詩文達一首云宗伯河閒姪
口吃善著書沈浸四庫閒提要萬卷餘抑揚百代上浩博
衡錙銖是爲脈望蟬神仙吞丹符 李文藻琉璃廠書肆
記鑑古堂韋氏頗曉事而好持高價予房師紀曉嵐先生

買其書費數千金 文達閱微草堂筆記趙清常歿子孫
鬻其遺書武康山中白晝鬼哭何所見之不達邪余嘗與
董曲江言大地山河佛以爲泡影區區者復何足云我百
年後儻圖書器玩散落人間使賞鑒家指點摩挲曰此紀
曉嵐故物是亦佳話何所恨哉 又云嘗見媒媪攜玉佩
數事云某公家求售外裏殘紙乃北宋槧公羊傳四葉爲
惆悵久之

二萬卷書誰作媵篋中打本一千通鞭笞犬豕庸非酷得失
何妨等楚弓 王昶德甫 王鳴韶鶴溪

漢學師承記王先生昶字德甫號述庵一字蘭泉又字棨
德江南青浦人乾隆甲戌進士官刑部侍郎 東湖叢記

王述庵司寇有一印云二萬卷書可貴一千通金石備購
且藏劇勞勩願後人勤講肄敷文章明義理習典故兼游
藝時整齊勿廢置如不材敢賈棄是非人犬豕類屏出族
加鞭箠述庵傳誠 鐵橋漫稿書初學記校本後嘉慶初
王蘭泉少司寇得宋板大字本余取徐本勘之得互異字
累萬 楹書隅錄宋巾箱本春秋經傳集解向爲青浦王
德甫先生所藏後歸揚州汪孟慈 錢大昕鶴溪子墓誌
銘君姓王氏名鳴韶字鶚起自號鶴溪子西莊光祿之弟
生平喜鈔書所收多善本 又跋薛尚功鐘鼎彝器款識
其墨蹟元時爲謝長源所得有周公謹趙子昂柯敬仲周
伯溫韓克莊達兼善王止仲諸人題此本乃明人就墨蹟

影鈔者故行款字體俱不失真舊藏虞山錢氏今爲王鶴溪得之

勝國遺文簡斷章

至尊垂聽發龍威埽除脈望開吟舫一樹椒花帳落暉朱筠竹君子錫庚少河

朱珪先叔兄墓志銘公諱筠字竹君一字美叔號笥河順天大興人考諱文炳生珪兄弟四人伯兄堂仲兄垣其次公行五珪其季也乾隆甲戌進士改庶吉士散館授編修以翰林院侍讀學士視學安徽時上方詔求遺書公奏言翰林院庫貯明永樂大典中逸書宜加采錄上覽奏異之下軍機大臣議行四庫全書得之大典

中者五百餘部皆世所不傳次第刊布海內實公發之也公聚書數萬卷種花滿徑來請謁者不拒考古箸錄窮日夜不倦卒年五十有三子二長錫卣次錫庚又和竹君兄詩前朝大典書萬部誰收整昌言陳至尊清聽元露警木天輻填咽鄭馬起遐靜斷簡發龍威高功題鳳屏遂成千秋嘉何惜一官冷又聞竹君叔兄歸寄懷詩挾策亡羊忙底事埽除脈望曬書頻又題椒花吟舫圖椒花吟舫誰創修笥河先生此息游十年卉木手灌植一時過從樊張儁又云少河抱書志肯構埽除三徑芟蕪猶椒馨花開一俯仰堂棣雖遠尙可求先正事略先生子錫庚字少河乾隆戊申舉人讀書好古精左氏春秋能世

其學 楹書隅錄宋本莆陽居士集有少河跋云乾隆庚子之夏正陽門外不戒於火逼邇里居是書與家藏百衲本史記倉猝中同爲胠篋持去余百計鉤稽始還青瑣神物護持定非偶然有大興朱氏竹君藏書之印笥河府君遺藏圖書錫庚閱目椒花吟舫各印

蘇帖蘇詩共一龕寶蘇室願學蘇庵僖崖笠屐曾相訪一葦煙篷到嶺南 翁方綱正三

先正事略翁先生名方綱字正三號覃溪順天大興人乾隆十七年進士由內閣學士左遷鴻臚卿嘉慶十九年重預瓊林宴賜二品卿銜時年八十二矣又四年卒先生精心汲古宏覽多聞嘗得宋槧蘇詩施願注本因以寶蘇名

其室自爲補注 復初齋文集寶蘇室研銘記子年十九日誦漢書一千字明海鹽陳文學輯本也文學號蘇庵則願以蘇齋名書室竊附私淑前賢之意戊子冬得蘇書嵩陽帖癸巳冬得蘇詩施願注宋槧殘本益發奮自勛於蘇學始以寶蘇名室 又坡公笠屐像贊此像繪於粵東時甫得嵩陽帖載一葦之煙篷後廿七年供於蘇齋之中乃得偃松屏贊與施願集注共香篆而交玉虹浩乎襟袖大海長風 又跋李雁湖注王半山詩云同年盧抱經借錄子昔年得宋槧施注蘇詩今得借抄李注王詩皆宋本之未經後人刪亂者而又皆是殘本事之相合有如此 又詩集買得蘇詩施注宋槧殘本卽商邱宋氏藏者 國初

海虞有二本其一寅歲收六丁維時湖南寶晉叟把卷凭
閣看飛熒宋元舊本鏤次第獨此未及傳模型可憐醴泉
化度法瑤台戍削留娉婷也是園翁痛著錄不得再黥隄
糜馨一朝東吳故家得四十二卷重汗青黃州判官有舊
夢笠屐圖子來丁甯由儀篇忽上客譜東廣微濫吹竽聽
銜薑黠鼠到潛采眾目特讓查田醒江南書手費影寫掇
拾想像於奇零施注實維施顧注施家蘇學詒過庭紹興
書歲嘉泰歲淮東板出倉曹廳漢稚楷書作佳話湖州詩
獄此又經石鼓文與會稽志同時校槧新發劓毗陵先生
世莫識要以土蝕成青萍卷前惜闕譜及目世閒僅此鳳
與星適者又得顧禧集文字聚合憑精靈重開此本倘異

日敢任嘉穀滋蝗螟摹公書帖奉公象笑彼亭長署杜亭
我當焚香日望拜公乎弭節來雲輶自注宣和閒禁蘇氏
文字學者私記其書曰毗陵先生 自題三萬卷齋笑論
架插鄴侯籤已愧湖州目錄兼秀水廚難入萬擬黃甘字
孰兩行添漢碑艸艸傳洪适宋槧寥寥拜子瞻化度銘圖
摹范老賜書樓印敢輕鈐 姚鼐惜抱軒詩集翁覃溪學
士出示所得宋雕本施注蘇詩舊藏宋中丞家者欣賞無
已乃次重九詩韻茲晨招客爲看書來似鴻儔飛撲撲雕
鑄遠有嘉泰字收藏近與商邱較蘇詩傳世幾千首高語
去天真一握當年獄案可悲傷他日注家還踏駁此編晚
出施顧手黨禁正解東南角後來補闕更何如虎賁雖在

中郎邈耽詩愛古皆結習計短衡長非大覺曾薄富貴書
何厚甘典衣裘襟可捉子瞻自是千載人學士豈比無心
學佳本與公吾亦欣叩門會辦來觀數 其藏印曰蘇齋
墨緣曰蘇齋真鑒曰祕閣校理又有恩加二品重謙瓊林
一印內閣學士內閣侍讀學士翰林侍讀學士一印

夢陶回憶禮陶時搜遍中華此最奇亦似曇花開易落不禁
雙淚墮如縻 周春芑兮

杭郡詩輯周蓮字同子號玉井海甯人乾隆癸酉舉人注
云玉井家多藏書偕其弟春自爲師友皆以博學名 開
有益齋讀書志海昌勝覽二十卷周春撰春字芑兮號松
靄晚號黍谷居士乾隆甲戌進士岑溪知縣嘉慶庚午重

赴鹿鳴卒年八十六有松靄遺書行世 海昌備志松靄
潛心著述所居著書齋終歲不掃除凝塵滿室插架環列
臥起其中者三十餘年四部七略靡不瀏覽 顧自修宋
刻陶詩跋武林鮑以文新倉吳葵里過松靄先生齋譚及
陶詩序末標湯漢不知何許人也先生便拍案稱好書且
告以宋史有傳文獻通攷著錄以文爽然若失隨叩陶集
攜行篋否則答云送海鹽張芑塘矣重午先生卽從芑堂
借觀芑堂見書破碎而裝面用金粟箋疑爲祕冊索還甚
急賴張佩兼調停出葉元卿夢筆生花大圓墨易之重一
斤閱兩年而議始定蓋得之之難如此以文多方購覓丙
午始得一鈔本芑堂慙惓葵里重雕共懺悔觀面失宋刻

公案則此書之流通未始非先生功德也 又黃丕烈跋
湯注陶詩宋刻真本松靄與宋刻禮書並儲一室顏之曰
禮陶齋其書祕不示人欲以殉葬賈人吳東白談及周公
先去禮書改顏其室曰寶陶齋今又售去改顏其室曰夢
陶齋並聞他估云周去書之日泣數行下亦可想見其情
矣 楹書隅錄陶詩有周春松靄海甯周氏家藏著書齋
許奎掌文有題周松靄
著書齋圖七律四首 松聲山房子孫世昌自謂是羲皇
上人內樂村農等印 陳增月墀遺稿周松靄師曇花館
所藏日本國人松貞文元泰古梅園墨譜歌如此遺編不
可尋濂溪夫子最淵深中華以外書搜遍第一人閒翰墨
林 又云長崎館外海雲稠造墨人還隔九州今日優曇

花下見勝他隨月讀書樓自注揚州江氏樓名樓藏日本
國人所著七經孟子攷文補遺

所見所聞所藏弄發凡真有著書才安知散帙非全帙趕廟

驅車日又來

李文藻素伯

翁方綱李南澗墓表君諱文藻字素伯號南澗山東益都
人乾隆辛巳進士同知廣西桂林府事爲學無所不賅齊
魯間藏書家自李少卿中麓王司寇池北書庫皆罕傳君
慨然以衰輯爲已任曰所藏書目曰所見書目曰所聞書
目皆詳其序列卷次誌其刊鈔歲月君年四十有九有三
子章鄧章棉章姚 錢大昕李南澗墓志銘南澗一字莖
腕性好聚書每入肆見異書輒典衣取債致之又從友朋

借鈔藏弄數萬卷皆手自讎校 南澗文集琉璃廠書肆
記乾隆己丑五月予以謁選居京師五月餘日借書鈔之
暇則步入琉璃廠觀書雖所買不多而書肆之不到者寡
矣又云內城隆福諸寺遇會期多有賣書者謂之趕廟散
帙滿地往往不全而價低朱少卿豫堂日使子弟物色之
積數十年蓄數十萬卷皆由不全而至於全蓋不全者多
是人家奴婢竊出之物其全固在日日待之而自至矣吾
友周書昌遇不全者亦好買之予好書與書昌同不及書
昌能讀耳

清梵雲中傍栢提借書園在灤源西伏生孔鄭同堂祀兩漢
經師半魯齊 周永年書昌

桂馥周先生傳周永年字書昌濟南歷城人結茅林汲泉
側因稱林汲山人先生於衣服飲食玩好一不問但喜買
書有賈客出入故家得書輒歸先生凡積五萬卷先生見
收藏家易散有感於曹石倉及釋道藏作儒藏說約予買
田築借書園祀漢經師伏生等聚書其中招致來學 沈
起元題水西書屋藏書目錄後余來主灤源書院講席得
周生永年其文矯然其氣凝然百無嗜好獨嗜書歷下書
不易得生故貧見其脫衣典質務必得得則卒業乃已今
所藏經史子集二氏百家之書已數千卷皆能言其義
翁方綱林汲山房圖二首因山並寺託幽居對畫看山十
載餘清梵雲中出鐘磬浩歌風外答樵漁芳菲百本仍開

圃悵望千秋更借書敲枕春明勞夢寐故鄉如此好林廬
鈔從館閣逮瞿曇中麓儲藏比未堪萬卷波瀾瀉瓶水干
峯結構到茅庵載書莫漫推池北名士從來屬濟南春雨
欲催農事起暮雲如畫點煙嵐 平津館鑒藏書籍記詩
話摠龜晏元獻類要有林汲山房藏書傳之其人印

紙渝墨敗編帙墜一一都來讀易樓不著標題能目識心如
剝繭與蕉抽 玉棟筠圃

王芑孫讀易樓記吾友玉棟筠圃於今輦下爲藏書家讀
易樓其所貯書處也迺者作圖示余屬爲之記筠圃於書
無所不讀自其少小以逮宦游舟車風雨無一日暫廢聞
一書在某所雖千百里必宛轉得之而後已於是沈編墜

帙渝墨敗紙世所滅沒不經見者往往都來讀易樓中於
凡函幅之小大厚薄潢治之精猶敝好涉目便記造次抽
檢未嘗輒誤予過樓中怪其插架不著標題曰吾能目識
之也其好之之勤如此 又歲暮懷人詩玉筠圃大令棟
一首君家藏書甲輦轂豈伊藏之實能讀讀書無伴苦相
求襍被留君讀易樓樓前乍種梧桐樹怱怱出宰山東去
歸舟未得遠相尋半道留書寫我心自注云君有書邀余
紆道過其所宰之陽信縣 翁方綱題筠圃讀易樓圖一
廬不爲託幽居自拓高窗日曝書萬卷瀾翻筌解外九師
閣束象滋初蠅頭細點研朱後塵尾清言屑玉餘彷彿郭
香碑篆在漁陽詩裏好林廬

老作儒官肩折腰瓣香敬爲劍南燒書臺豈共朱槌改一字
烏焉訂月霄間槌種懷

葉裕仁聞氏兩廣文先生合傳聞書巖先生諱朱槌改斑
字種懷書巖其號也乾隆壬申恩科登鄉薦以大挑選江
甯教諭平生無他嗜好惟讀書不少輟手鈔書盈篋得善
本校讎點勘丹黃滿紙所蓄金石文字幾及千種嘗得王
損仲宋史記舊稿爲海內希有之書謀鐫板不果嘗以爲
憾錢宮詹主講婁東書院書放翁遠聞佳士輒心許老見
異書猶眼明句以贈蓋紀實也 愛日精廬藏書志景定
建康志十五卷黃氏跋曰嘉慶丙辰從書肆得景宋鈔殘
本九冊有半蓋浙省書攤以此爲模稜書籍之廢紙彼以

素紙易之故奇零如是予因假抱冲本鈔補抱冲本爲鎮
洋聞公名珽字書臺之所藏與錢少詹友善

謁者陳農訪異書山巖屋壁或藏諸千山來兩留佳話未到
青陽博士廬周厚培仲育 沈紹賓廷作

四庫提要乾隆三十九年奉

上諭進書百種以上

如江蘇周厚培蔣曾瑩浙江吳玉埏孫仰曾汪汝璫以及
朝紳中黃登賢紀昀勵守謙汪如藻等俱藏書舊家著每
人賞給內府初印之佩文韻府各一部俾珍爲世寶以示
嘉獎 松江府續志周厚培字仲育婁縣人諸生家千山
下高才淹雅工詩嘗撫撫千山瓊事成竹枝詞百首其先
世與趙松雪諸名人交富藏書乾隆中開四庫全書館厚

增進書數百種

賜佩文韻府

御製石刻又

御筆題詩於其所進宋本兩漢博聞上皆異數也

厚培敬取

御製詩中來兩字名其書樓王昶為之

記 又沈紹賓字廷作華亭人學士粲九世孫由明經官
青陽訓導博學工詩古文藏書五萬卷皆手自評閱年七
十四卒著有月澗山房稿

杭州壽松堂孫氏蘇州壽松堂蔣氏同在乾嘉全盛時各關

小齋貯經史

孫宗濂栗忱

子仰曾

蔣升瀛惠堂

杭郡詩輯孫宗濂字栗忱號隱谷仁和人乾隆甲子舉人
注云隱谷一試春官不見收遂息轍鄉里構堂曰壽松藏
書數萬卷以枕莊為樂年四十三而歿一時士論惜之

杭世駿孫隱谷傳隱谷未嘗一日廢書庭有嘉樹築堂名

壽松廣儲羣籍有友六七人皆高岸無凡情時來偃息

拜經樓藏書題跋記宋本前漢書仁和朱朗齋跋云壽松

堂孫氏有溫公通鑑一部較外間明刻本多增所未備河

有補於史學 四庫提要乾隆三十九年五月十四日奉

上諭今閱進到各家書目浙江吳玉墀孫仰曾汪

汝琛俱藏書舊家每人賞給初印之佩文韻府一部以示

嘉獎昌熾案仰曾宗濂之子 士禮居藏書題跋記淳祐

臨安志六卷簡莊賦詩云關心志乘無全帙屈指收藏又

一家自注同郡孫氏壽松堂舊藏宋本乾道臨安志三卷

又東京夢華錄十卷濂溪蔣氏散出為壽松堂孫氏收

得宏治甲子刊本每葉十六行行十六字 又西谿叢語
壽松堂蔣氏有錢遵王校本又有一舊鈔本 莫氏宋元
舊本書經眼錄四書集注宋本鴻城蔣懷堂珍藏蔣氏跋
云曾王父諱升瀛字步蟾一字惠堂又號采若南宋希魯
公之二十世孫世居吳淞之鄧港村公自幼厲志讀書早
歲有聲庠序後遷入城蕭家巷辟鏡古齋藏書多宋槧本
郡守菴石蘇公重刊魏公譚訓稱壽松堂蔣氏宋本校刊
者卽公所藏也同治丙寅仲夏培澤敬識

羽陵姓字

九重聞闕史

題詩

帝右文正是夕陽無限好白頭攜杖拜

卿雲 鮑廷博以文

嘉興府志流寓傳鮑廷博字以文本歙人以商籍生員寄
居桐邑青鎮之楊樹灣 阮文達知不足齋鮑君傳

高宗純皇帝詔開四庫館采訪天下遺書鮑君廷博集
其家所藏書六百餘種命其子士恭由浙江進呈既著錄
矣復奉 詔還其原書唐闕史及武經摠要皆

聖製詩題之嘉慶十八年方公受疇巡撫浙江奉

上問鮑氏叢書續刊何種方公以第二十六集進奉

上諭鮑廷博年逾八旬好古積學老而不倦著加恩
賞給舉人俾其世衍書香廣刊祕籍亦藝林中勝事也元

案君又號涿飲世爲歙人父思誦攜家居杭州君以父性嗜讀書乃力購前人書以爲歡既久而所得書益多且精遂哀然爲大藏書家自乾隆進書後蒙 御賜古今

圖書集成伊犁得勝圖金川圖彙膺

異數

褒獎彌隆君以進書受

主知謂諸生無可報稱乃

多刻所藏古書善本公諸海內至嘉慶十八年年八十有六所刻書至二十七集未竣而君以十九年秋卒 翁廣平鮑涿飲傳先生世居歙之西鄉父母相繼卒於杭乃卜葬於湖州烏程縣某鄉後遷居桐鄉縣之烏青戍今爲桐鄉人也生平酷嗜書籍每一過目卽能記其某卷某葉某譌字有持書來問者不待翻閱見其版口卽曰此某氏版

某卷刊譌若干字案之歷歷不爽 又賜書堂記

高宗純皇帝賜古今圖書集成先生旣拜受是書闢堂三楹分貯四大廚顏其堂之額曰賜書 朱文藻知不足齋叢書序吾友鮑君以文築室儲書取戴記學然後知不足之義以顏其齋君讀先人遺經益增廣之令子士恭復沈酣不倦君字之曰志祖蓋嗜書累葉如君家者可謂難矣三十年來近自嘉禾吳興遠而大江南北客有舊藏鈔刻異本來售武林者必先過君之門或遠不可致則郵書求之浙東西諸藏書家若趙氏小山堂汪氏振綺堂吳氏餅花齋汪氏飛鴻堂孫氏壽松堂鄭氏二老閣金氏桐花館參合有無互爲借鈔至先哲後人家藏手澤亦多假錄得

則狂喜如獲重貨不得雖積思累歲月不休余館於振綺
堂十餘年君借鈔諸書皆余檢集君所刻書余嘗預點勘
余與君同嗜好共甘苦君以爲知之深者莫余若也定
香亭筆談以文嘗爲夕陽詩盛傳於時人呼爲鮑夕陽余
贈以句云清名卽是長生訣當世應無未見書何處見君
常覓句小闌干外夕陽疏 昌熾案以文二孫長曰正言
次日正字見前宋樓藏書志所載泣蘄錄跋又自號通介
叟其玉壺清話跋題乾隆庚子識於寶繪堂著有花韻軒
詠物詩存 拜經樓題跋記霏雪錄涿飲所貽有世守陳
編之家老屋三閒賜書萬卷歛西長塘鮑氏知不足齋藏
書印三圖記

